



IJAMBO RYA NYAKUBAHWA MADAME JEANNETTE
KAGAME

IHURIRO RYA 16 RYA UNITY CLUB INTWARARUMURI



KU WA 29 UKWAKIRA 2023
INTARE CONFERENCE ARENA

**Batumirwa bacu bahire,
Ntwararumuri, Bavandimwe duteraniye aha,
Nshuti za Unity Club,
Abarinzi b'Igihango,
Rubyiruko Bana bacu,**

Muraho neza!

- Mbanje kubashimira kuba mwongeye kwitabira ubutumire bwacu.
- Mbahaye ikaze muri iri huriro rya 16 rya Unity Club, rigaruka ku nsanganyamatsiko, tumaze iminsi dukoresha mu biganiro byacu, igira iti: **“Ndi Umunyarwanda: Igitekerezo-ngenga cy’Ukubaho Kwacu”**.
- Kumva agaciro k’iyi nteruro, bisaba gusubiza amaso inyuma gato, no kureba ibyubatswe muri iyi myaka hafi 30 u Rwanda rumaze rwibohoye, bikadutera kunezezwa n’ibimaze kugerwaho, mu rugendo rw’ubumwe n’ubudaheranwa by’Abanyarwanda.

- Twahisemo kuba umwe, icyo twiyemeje ni u Rwanda rudaheza, u Rwanda rw’abunze ubumwe, barukunda, barukorera, kandi bakarurinda.
- Mu mwiherero wabanje ku munsu w’ejo, twaganiriye birambuye, ku ndangagaciro, ndetse n’imyitwarire ikwiye kuturanga nk’Intwararumuri.
- N’ubwo kuba Intwararumuri ari umuhamagaro twihitiyemo nk’Abanyamuryango, turifuza ko namwe mwese mwadushyigikira muri uwo muhamagaro uru rumuri tugakomeza kurugeza kuri bese.

Banyamuryango, Batumirwa bahire,

- Kuba Abanyarwanda bataraheze mu icuraburindi ni uko byaharaniwe bigatwara n’ikiguzi tutabonera agaciro. Bikwiye rero kuba isomo ry’ubuzima kandi bikaba umusingi uhoraho w’ubumwe bw’Abanyarwanda.

- **"Ndi Umunyarwanda"** ni inshingano n'uburenganzira, niyo mpamvu ikwiriye kuba intero n'inyikirizo mu byo dukora byose.
- Aho niho Ndi Umunyarwanda izava mu mvugo gusa ahubwo iturange mu byo dukora byose, kugeza no muri **'DNA'** yacu, bityo n'abadukomokaho bazakure bafite za ndangagaciro na kirazira bikwiriye kuturanga.
- Unity Club yiyemeje gukomeza gutanga umusanzu wo kurebera hamwe n'izindi nzego, uko gahunda ya Ndi Umunyarwanda yagezwa ku Banyarwanda bose, aho bari hose.
- Turazirikana kandi turishimira amahirwe yo kuba mu bihe byose bikomeye, u Rwanda rwarabonye abarubera mu njishi ya Ndi Umunyarwanda, bakarurinda kuzima kandi rwarabyaye intwari.

- Kuva 2015, twatangije gahunda yo kwizihiza Abarinzi b'Igihango, bagashimirwa ibikorwa by'indashyikirwa byabaranze cyangwa bibaranga mu buzima bwabo, mu kwimakaza ubumwe bw'Abanyarwanda.
- Nagira ngo dufate umwanya wo gushimira Abarinzi b'Igihango ducyeza muri iri huriro, abariho n'abatakiriho. Mumfashe tubashimire!

Bavandimwe - Ntwararumuri, Bayobozi mu nzego zitandukanye, Babyeyi,

- Dufite umukoro ukomeye ariko ushoboka wo kuraga abana bacu ibyiza bibumbatiye ubumwe.
- Ntidukwiye gutsindwa n'ingeso mbi nk'ikimenyane, gushaka indonke, munyangire, gutonesha n'ibindi; byatuma duteshuka ku gitekerezo-ngenga cyacu - Ndi Umunyarwanda. Tutabaye maso bishobora kodusubiza mu icuraburindi u Rwanda rwigeze kubamo.

Rubyiruko bana bacu,

- Nimwe Igihugu gitezeho imbaraga n'ubushobozi buzasigasira uwo musingi twubatse. Mwiteguye mute kwakira iyo nkoni y'abarinzi ba Ndi Umunyarwanda?
- Turabasaba gukunda igihugu, mukarangwa n'ikinyabupfura, mukaba intangarugero ndetse mukagira imyitwarire ikwiye, ari byo bizatuma mugira icyerekezo gihamye, kandi gifite intego iganisha ku iterambere rirambye ry'Igihugu.
- Tubivuga kenshi ariko ntacyo bitwaye kubisubiramo: Ntimuri bato bo kutumva umurongo Igihugu cyihaye.
- Ku bakuru natwe duharanire iteka kumenya gushishoza, tumenye icyashaka guhungabanya ubumwe bwacu tugikumire hakiri kare. Ubunyarwanda n'u Rwanda ni bikuru kuri twe twese.
- Mu gutangiza iri huriro ryacu rya 16, twese intero ibe imwe: **Kureba Kure!**

***Twiyubakire ubumwe bwacu,
Si ubwa none bwahozeho kuva kera,
Dusenyerere umugenzi umwe,
Abato n'abakuru twifurizanye ibyiza,
Tubumbatire isano-muzi yacu ituranga,
Twirinde uwatuyobya,
Twegere abatabyumva,
Turindane muri urwo rugendo,
Twimakaze ibyiza bitubereye,
Ngiryo ibanga rya "Ndi Umunyarwanda".***

- Mbifurije ibiganiro byiza, biza kuduha ingamba nshya mu nshingano zacu nk' abayobozi n'ababyeyi barerera u Rwanda!

Murakoze!